

# 日本三代實錄卷第九 清和紀九

太上天皇 清和天皇

起貞觀六年六月，盡十二月

左大臣-從二位-兼行左近衛大將臣-藤原朝臣-時平等，奉敕撰

## 一.女御藤原貞子薨與敕令尾張鎮謝淺間名神

太上天皇 清和天皇

六月丙辰朔，十一日丙寅，月次并神今食祭。親王、公卿向神祇官，奉祭如常。

十六日辛未，授大和國-從五位上-宗我都比古神，正五位下。

廿三日戊寅，敕改定信濃國牧貢御馬期。

大和國-從四位下-波賣神、波比賣神，並授正四位下。

廿八日癸未，以散位-從五位下-藤原朝臣-萬枝，為上總介。外從五位下-賀陽朝臣-宗成，為安房守。從五位下-行讚岐權掾-藤原朝臣-弘經，轉權介。

秋七月，乙酉朔，日有蝕之。

四日戊子，廣瀨、龍田祭如常。

十日甲午，遣使者奉幣於伊勢太神宮。

進平野-從一位-今木大神階，加正一位。

十一日乙未，加賀、出雲兩國，疾疫。

十四日戊戌，天皇御前殿，觀相撲。

十五日己亥，陸奧國磐瀨郡權大領-外正六位上-磐瀨朝臣-長宗，借敘外從五位下。

十七日辛丑，頒下五畿、七道諸國，班幣境內大小諸神，為穀祈也。

甲斐國言：「駿河國富士大山，忽有暴火。燒碎崗巒，草木焦熱。土鑠石流，埋八代郡本栖并割兩水海。水熱如湯，魚鱉皆死。百姓居宅，與海共埋。或有宅無人，其數難記。兩海以東，亦有水海。名曰-河口海。火焰赴向河口海、本栖割等海。未燒埋之前，地大震動。雷電暴雨，雲霧晦冥。山野難辨，然後有此災異焉。」

十九日癸卯，天皇御前殿，觀相撲。

廿日甲辰，天皇御前殿，觀童相撲。

廿三日丁未，有星，出自營室入羽林東。赤黃無光。

廿五日己酉，授和泉國-正六位上-卷尾神，從五位下。

廿七日辛亥，敕曰：「去年七月廿五日，頒下五畿并伊賀、伊勢、志摩、遠江、相模、上總等國云：『鎮護國家，消伏災害，尤是敬神祇，欽祭禮之所致也。是以，格制頻下，警告愍懃。今聞：「諸國牧宰不慎制旨，專任神主禰宜、祝等，令神社破損，祭禮疏慢。」神明由其發祟，國家以此招災。今欲令諸社一時新加華餽。』而經月踰年，未有修造。宜早加修餽，勿致重怠。」

進筑後國-從二位-高良玉垂命神階，加正二位。從四位下-豐比咩神，從四位上。武藏國-從五位下-若雷神，從五位上。

右京人-無位-民首-方永，賜姓-真野臣。天足彥國忍人命之後也。

八月乙卯朔，三日丁巳，釋奠如常。從五位下-行助教-兼越前權介-菅野朝臣-佐世，發尚書題。文章生等賦詩。

是日，仁明天皇女御-正三位-藤原朝臣-貞子，薨。敕贈從二位。葬深草山陵兆域之內。仁明天皇平昔賜顏色所許也。遣參議-大藏卿-正四位下-源朝臣-生，散位-從四位下-弘宗王等，監護葬事。貞子者，右大臣-贈從一位-三守朝臣之女也。風容甚美，婉順天至。仁明天皇為儲貳，以選入震宮，寵愛日隆。天皇踐祚之初，天長十一年十一月，授從四位下。承和六年正月，進爵授從三位。嘉祥三年七月，加正三位。先是，誕育一皇子、二皇女。親子內親王、平子內親王。皇子者，第八-成康親王是也。雖不登后位，而宮闈權勢，無與為比。嫌私加愛，終始無衰焉。

四日戊午，明經博士等奉參御在所，不喚御前，賜祿而罷。

五日己未，下知甲斐國司云：「駿河國富士山火，彼國言上。決之耆龜云：「淺間名神禰宜、祝等，不勤齋敬之所致也。仍應鎮謝之狀告知國訖，宜亦奉幣解謝焉。」

## 二.諸氏賜姓與下符諸國責調庸羸惡

八日壬戌，右京人-故外從五位下-岡屋公-祖代，賜姓-八多朝臣。其先，出自八太屋代宿禰也。八多，左京人-武藏權大掾-正七位下-大丘造-塵繼，散位-從七位上-大丘連-田刈等四人，賜姓-宿禰。其先，百濟人也。大丘，左京人-玄蕃大允-正六位上-阿刀連-粟麻呂，主殿大屬-正六位上-阿刀宿禰-石成，下野權大目-正七位上-阿刀連-禰守，右京人-陰陽允-阿刀物部-貞範等，並賜姓-良階宿禰。神饒速日命之裔孫也。良階，右京人-二品秀良親王家令-正六位上-宇自加臣-吉人，賜姓-笠朝臣。彥狹嶋命之後也。笠，阿波國名方郡人-二品治部卿兼常陸太守賀陽親王家令-正六位上-

安曇部-粟麻呂,改部字賜宿禰.粟麻呂自言:「安曇百足宿禰之苗裔也。」安曇.讚岐國多度郡人.美作掾-從六位下-秦子-上成,弟-無位-秦子-彌成等三人,賜姓-忌寸.本系出自秦始皇帝也.秦子.播磨國鎋磨郡人-播磨權醫師-正八位上-和邇部臣-宅貞,式部少錄-從八位上-和邇部臣-宅守等,賜姓-邇宗宿禰.邇宗.左京人-散事-從五位下-水取連-夏子,故外從五位下-水取連-柄仁,故外從五位下-水取連-繼男等,賜姓-朝臣.神饒速日命之後也.水取.尾張國海部郡人-治部少錄-從六位上-甚目連公-宗氏,尾張醫師-從六位上-甚目連公-冬雄等同族十六人,賜姓-高尾張宿禰.天孫火明命之後也.高尾張.左京人-山村忌寸-安野、夏野、全子等,賜姓-紀朝臣.紀角宿禰之後也.紀.右京人-內教坊頭-從七位下-秦忌寸-善子,賜姓-伊統朝臣.弟-秦忌寸-安雄等,賜姓-伊統宿禰.伊統.播磨國鎋磨郡人-陰陽大屬-正六位上-日下部利貞,父-武散位-正六位下-日下部-歲直等,賜姓日下部連,貫附攝津國嶋上郡.狹穗彥命之後也.日下部.播磨國鎋磨郡人-陰陽寮陰陽師-從八位下-弓削連-是雄,父-正六位上-弓削連-安人等,改本居,貫附河內國大縣郡.弓削.近江國犬上郡人-左近衛府生-正七位下-春良宿禰-諸世,改本居貫附山城國愛宕郡.河內國若江郡人-故從五位下-春江宿禰-安生,式部大錄-正六位上-春江宿-禰良並,大宰大典-從六位上-春江宿禰-敏雄,蔭子-正六位上-春江宿禰-常嗣等,改本居,貫附左京職.

九日癸亥,敕:「配流越中國罪人-伴-那賀人,免罪入京。」

太政官下符東海、東山、北陸、山陽、山陰、南海、大宰府,責調庸麤惡稱:「貞觀元年十二月十五日,下七道諸國符稱:『大同二年十二月廿九日格云:「麤惡之罪者,格條所指,科責非輕.而今諸國所貢絹布等,愆是麤惡,專無精麗.或如絹非絹,尤同蜘蛛之秋網,或如布非布,不異連瑣之疏文.加以尺寸多欠,短狹無數,徒有輸貢之勞,還闕支給之備.』是則牧宰專忘格制,唯事規避之所致也.法設不行,雖是寬典,人狎不慎,實須懲肅.然而漸染所成,難可頓責.宜誠既往之怠,以求將來之效.』符出之後,數年于茲,猶不懲肅,彌致麤惡.即知,空張格制,不行其罰,國宰狎來所積之漸也.須准之科條,必其罪責.而時尊深仁,政先鴻恕.年來優容,特聽檢納.如此之費,既成姦濫.論之政途,理何合然.自今以後,猶有麤惡,論之如格,不曾寬恕.』

十日甲子,右京絕貫百姓-大中臣朝臣-豐御氣自言云:「親父-麻呂,故刑部卿-從四位下-東人之玄孫也.豐御氣祖父-男成,流寓大宰府,父-麻呂相隨.男成生長彼土,歷數十年,貫屬既絕.請復本屬,更為編戶.」神祇伯-從四位下-中臣朝臣-逸志等證之.敕:「麻呂、豐御氣、多勝、春秀等男女十人,復本貫右京五條一坊.」

山城國乙訓郡人-內膳-典膳-正六位上-丈部谷直-平雄,散位-正七位上-丈部谷直-福麻呂等,改本居,貫附左京.丈部.河內國丹比郡人-大宰大典-正六位上-安原宿禰-臣雄,左近衛將曹-從六位下-安原宿禰-貞臣等,改本居,隸右京職.安原.

### 三.大宰府請令留唐僧法惠住觀音寺備通事

十一日乙丑,伊賀國名張郡人-左史生-從六位下-伊賀朝臣-春野,改本居,貫附山城國葛野郡.

十三日丁卯,節婦-紀伊國名草郡人-伴連-宅子,敘位二階,免戶內田租,表其門閭,以旌貞節.先是,大宰府言:「大唐通事-張-友信渡海之後,未知歸程.唐人來往,亦無定期.請友信未歸之間,留唐僧-法惠,令住觀音寺,以備通事.」太政官處分:「依請.」

十四日戊辰,詔以美作國-從四位下-仲山大神,武藏國-從五位下-蒲田神,並列官社.

十五日己巳,美作國-從五位下-長田神、兔上神、前社神、佐原神、形賣神、壹粟神、橫見神、久止神、高野神等,並授從五位上.

是日,制:「筑前國香椎廟司,以六年為年限.」

十七日辛未,進女御-從四位下-藤原朝臣-多美子階,加從三位.播磨國赤穗郡大領-外正七位下-秦造-內麻呂,借敘外從五位下.

右京人-河內守-從五位下-蕃良朝臣-豐村,右大史-從六位下-葛井連-宗之,兵部少錄-正六位上-葛井連-居都成等,賜姓-菅野朝臣.本系,出自百濟國人貴須也.菅野.右京人-散位-從五位上-讚岐朝臣-高作,右大史-正六位上-讚岐朝臣-時雄,右衛門少志-正六位上-讚岐朝臣-時人等,賜姓-和氣朝臣.其先,出自景行天皇皇子-神櫛命也.和氣.左京人-大皇太后宮少屬-正七位上-百濟宿禰-有世,賜姓-御春朝臣.有世,其先出自百濟國人-比有也.御春.右京人-主計算師-正八位上-大窪-峰雄,主水權令史-正六位上-大窪-清年等,賜姓有宗宿禰.有宗.左京人-正八位下-刀岐直-永繼等姊妹五人,賜姓-滋岳朝臣.滋岳.左京人-右近衛將曹-正六位上-和藥使主-弟雄,式部位子-從八位下-和藥使主-安主,兵部位子-從八位下-和藥使主-黑麻呂等,改使主,賜宿禰.其先,吳國人-智聰也.和藥.

美濃國-多藝郡人-太政官史生-正八位下-物部-吉宗,改本居,貫附山城國愛宕郡.

廿日甲戌,授和泉國-從五位下-卷尾神,從五位上.

廿三日丁丑,延六十僧於紫宸殿,限以三日,轉讀大般若經.

廿五日己卯,敕以平朝臣-寬子,為女御.

左京人-主水令史-正七位下-水取連-繼人,散位-正八位下-水取連-繼主,賜姓-宿禰.

九月乙酉朔,三日丁亥,天皇潔齋、奉燈如常.

四日戊子,地震.

和泉國大鳥郡人-民部少錄-正七位下-蜂田連-瀧雄,改本居,隸左京職.

九日癸巳,重陽之節.天皇御前殿,賜宴於群臣,如常儀.賜祿各有差.

是夜,有星,出紫微宮入昴.長可三丈餘.

十一日乙未,遣使者於伊勢太神宮,奉幣.例也.

十四日戊戌,是夜,有星,出自奎婁間入於外屏。  
廿六日庚戌,地震。  
廿七日辛亥,東京有火。  
冬十月,甲寅朔,天皇御前殿,宴于侍臣.左右近衛府奏音樂.賜祿如常。  
是日,復出雲國仁多、飯石兩郡百姓課役二年.以不宜農蠶也。  
三日丙辰,請六十僧於內殿,轉讀大般若經,限三日訖。  
七日庚申,夜,北山有光,如電.又朱雀門前見赤光,長五尺許。  
九日壬戌,地震。  
十一日甲子,坐太政大臣東京第-正二位-勳八等-田心姬神、湍津姬神、市杵嶋姬神,並進階級,加從一位。  
以傳燈法師位-空操,為內供奉十禪師。  
十二日乙丑,地大震動。  
十四日丁卯,以散位-從五位下-紀朝臣-吉繼,為安房守.民部少輔-從五位下-笠朝臣-弘興,為丹波權守.散位-從五位下-百濟王-俊聰,為伯耆守.伯耆守-從五位下-布瑠宿禰-清貞,為豐前守。  
十五日戊辰,備中國-從五位下-宮原神,加授從五位上.伊賀國-正六位上-安部神、伊賀津彥神,讚岐國-正六位上-屋栗神、梶州天川宇夫志奈神、賀富良津神等,並從五位下。  
廿一日甲戌,天皇御前殿.右近衛、右衛門、右兵衛等三府及右馬寮獻物.去五月六日競馬走馬之輸物也.音樂備舉,百戲皆作。  
極醉方罷,宴竟,賜祿各有差。  
廿六日己卯,夜,雷三聲。

#### 四.大宰府奏健磐龍命神靈池與比賣神嶺異怪事

十一月,甲申朔,陰陽寮奉進御曆.天皇不御前殿,內侍奏之。  
四日丁亥,敕停肥後國大宅牧。  
始置玄蕃寮寮掌一員。  
五日戊子,授出羽國-正四位上-勳五等-大物忌神,從三位。  
七日庚寅,詔:「免除無品-人康親王家借絹百卅疋、綿三百屯、調布四百端、錢三千三百貫文。」  
先是,大和國言:「平城舊京,其東添上郡,西添下郡.和銅三年,遷自古京,都於平城.於是,兩郡自為都邑.延曆七年,遷都長岡.其後七十七年,都城道路,變為田畝.內藏寮田百六十町,其外私竊墾開,往往有數.望請收公,令輸其租。」許之。  
十日癸巳,備後國品治郡人-左史生-從八位上-品治公-宮雄,改本居,貫附山城國葛野郡.從四位下-橘朝臣-影子,卒。  
十二日乙未,敕令五畿內并山陽、南海兩道,預鎮謝疫癘.兼轉讀般若大乘.以神祇官奏言彼諸國可有天行也。  
十三日丙申,夜,熒惑入守弓。  
十七日庚子,右近衛府,有犬死穢.停大原野祭。  
十八日辛丑,園、韓神祭如常。  
十九日壬寅,鎮魂祭如常。  
廿日癸卯,新嘗祭.天皇不御神嘉殿.敕親王公卿,於神祇官奉祭。  
廿一日甲辰,天皇御前殿,賜新嘗祭豐樂宴於群臣.大歌五節舞.賜祿如常。  
廿二日乙巳,敕:「復下總國葛餅、印幡、相馬、埴生、猿嶋五郡百姓調庸二年。」以往頻憂水旱也。  
廿六日乙酉,雷雨。  
卅日癸丑,日有蝕之。  
十二月甲寅朔,十日癸亥,敕:「加置伊勢豐受神宮御馬飼內人一人。」以元御馬二疋,充飼內人一人也。  
駿河國言:「駿河郡帶三驛二傳,橫走、永倉、柏原驛家是也.惣差點丁驛子四百人,傳子六十人.年來疫旱荐臻,課丁欠少,因而驛傳子等不能滿數.郡民凋殘,莫甚於此.望請,廢柏原驛,富士郡蒲原驛遷立於富士河東野.然則蒲原驛與永倉驛,行程自均,民得息肩。」從之。  
十一日甲子,月次并神今食祭.天皇幸宮內省,親奉祭。  
十四日丁卯,若狹國言:「謹檢齊衡二年五月十九日格稱:『當年調庸,來年不究.明年三月卅日以前,主計寮具錄未進之數,移主稅寮,准未進之數.沒國司史生已上公廩.』者.貞觀四年三月廿日格稱:『非受業博士、醫師,宜准史生責其解由.』者.然則史生已上既立其制,博士、醫師不入沒例.況復從事同於史生,何獨保其俸料.望請,博士、醫師,除受業練道人之外,同沒公廩.」從之,諸國亦准此。  
十八日辛未,敕公卿獻荷前幣如常。  
廿一日甲戌,授丹後國-從五位上-籠神,正五位下。  
廿三日丙子,內殿始修佛名懺悔如常。  
廿六日己卯,大宰府言:「肥後國-阿蘇郡-正二位-勳五等-健磐龍命神靈池,去十月三日夜,有聲震動.池水沸騰空中,東南洒落.其落東方者,如布延縵,廣十許町.水色如漿黏著草木,雖經旬日,不消解.又比賣神嶺,元來有三石神,高四許丈.同夜,二石神頽崩.府司等決之龜筮云:『應有水疫之災.』」

廿九日壬午晦,大袂、大儼如常.

日本三代實錄卷第九 終

[\[久遠の絆\]](#) [\[卷第八\]](#) [\[卷第十\]](#) [\[再臨ノ詔\]](#)